



Jesus Kristus Oye Umwe  
Onghela, Nena Nofiyio Alushe

*by*

Rev. William Branham



# ONHETEKELINDJOVO

Okambo aka okanyolwa opo keshe umwe ou teka lesha a shiive kutya Jesus Kristus natango ota Xupifa nota Velula ovanhу.

Eitavelo lange kutya Ye okuli popepi nokuholoka natango.

Okambo aka otakapopi nghee Ye ahoolola okamati okafyoona ndele tekaifana keudifo laye, nghee okamati kafadukapo pu Ye okafimbo ndele nee nomutima-aushe oka tanaukila ku Ye.

# EILIKANO

Oh Tate uli mEulu, kwafenge yambeka kesheumwe ou talesha okambo aka.

Pitika va shiive kutya Ove oto ka ifana Ongeleka yeenghono meendelelo, ngaashi ei inatu mona nale.

Fye natango otwe Ku itavela.

Shita odjuulufi mu keshe omutima ndele, Oh Ou Omuyuuki, kwafa omupiya woye omulininipiki a twale komesho etumwalaka Loye.

Ame ondishishi Ove owaholekange meembungu, ngaashi Ove waninga Moses molwelalakano lonumba.

Hano Tate, kwafenge ndifimanekе edina loye, sho ame ohandi shi pula medina la Jesus.

Amen

# Jesus Kristus Oye Umwe Onghela, Nena Nofiyo Alushe

Onda dalelwa mo Cumberland County, Kentucky, mokatwali kashona. Oo tate na meme ova hombolele vashona naame Onda li okaana kavo kotete. Onda lombwelwa ku meme kutya eshi ndali ashike lwopeemwedi hamano, na tate okwali a djamo meumbo, okwa li twa mangwa-kosinou meendudu omafiku onumba. Otwa li twa manapo oikulya na meme okwali ta nangatele efimbo keshe. Ko hauxuuninwa okwa li adilaadila kutya exulilo ole uya. Okwa ti kutya okwa ongela oikutu yetu aishe noikumbafa ndele eshi atulange momaoko aye okwe i tonyena kushe aishe opo tu kale twa pupyalekwa ngaashi tashishiva.

Omuleshi omuholike, Onda itavela kutya olo okwali exulilo ngeno okwa li Omuxupifi wetu omuholike ine uya poshikando opo pefimbo opo. Ndele Ye alushe oku li popepi nota holoka pefimbo lawapala. Ye okwa popya nomuholike omunamutima-yapuki omushiinda womukulupe ndele temulombwele e uye a tale kutya omolwashike moluungu letu mwakala itamu di nande omwifi omafiku mashona apita. Eshi afika ndele telipanunine mokatwali okwa hanga hatu hale kufya kondjala fye nameme. Okwa kufa oikuni yonumba ndele tatema omundilo. Ndele tashuna kokatwali kaye eke tu talele oikulya. Mefimbo lishona otwa li mondjila yetu koukolele noundjolowelete natango. Tumbaleka edina Laye molwaasho.

Mefimbo lishona konima yaasho otwa fiyapo oshilongo sha Kentucky notwa tembukila ko Indiana. Tate okwa ka longela omunafaalamo popepi na Utica, Indiana. Otwa kala oko lwodula imwe ndele hatutembukile kokule pedu molufilu la Ohio. Eedula donumba dapita na Ame ndakula ndininge okamati kakula-nawa eshi Kalunga apopya naame.

Ondali mondjila yange komatango amwe handi twala omeva keumbo okudja komaanda, ookwali eli lwopokaboloka kamwe okudja meumbo. Lwondjila-kati pokati keumbo nomaanda okwali pena omuti mule wa kulupa. Ondali ashike opo nda fiki meumbo okudja kofikola komatango oo noumatyona vakwetu vopoushiinda okwali ta vai kondungu yakulupa vakandjolole. Ondali handi kweneneko ndele tate okwa ti kutya ondina okukadila omeva. Onda fikama koshi yomuti ndi fuwepo eshi mefimbo lixupi nda uda omhepo tai pepe omafo. Ondali ndishishi kutya ka yali taipepe konhele imwe ilili. Okwali takumonika kwa mwena omutenya oo. Onda katukila konima okudja momuti nonda didilika kutya onhele ifike lwopombalili ota i monika taipepe momafo omuti. Ndele nee okwadja ewi taliti: "Ino nwa nande oikolwifa, omakaya, ile ukakeke olutu loye momukalo keshe, osheshi Ame ondina oshilonga una okushilonga ngeenge wa kulu."

Osha tilifile nge, kutya Onda tondokela keumbo ndele Inandi shi lombwela nande oumwe. Itandi nu oikolwifa ile omakaya. Onda itavela Kalunga otaka longa oshilonga shakula momafiku axuuninwa.

Eshi Nda kula nawa ndawana oku ka endaenda neengudu dovanyasha, vo ohava yolo nge vo tavati ame ohandi luumbata ndafa oukadona eshi itandi nu omakaya ile oikolwifa. Ohava ti nee kutya nande oukadona otava nu omakaya nokutya vo ovena omaliudo edule Ange. Ondali nda fya ohoni okuva lombwela eshi shaningwa po monghalamwenyo yange. Ndele, okaume ovaholike, Ohandi mono efimano moku shi lombwela unyuni nena pehenamalimbililo asha. Haleluya!

Lwopeedula omulongo nanhee okwa li Nda ehamekwa neenghono manga ndali moukongo. Onda kala eemwedi heyali moshipangelo. Kalunga okwa longa naame ndele Ame itandi pwilikine. Eifano olakala noku hapupala no nokuhapupala moshili kwaame. Ndele moku ha putukila meumbo liheshi louKriste Onda kendabala okuli anya. Omafimbo mahapu

Onda uda ewi olo lishona, lamwena tali ufanange, ndele Ohandi li shunifako. Onda ninga kutya Ohandi fikama noudjuu nande okuuda ongeleka taitongwa.

Efiku limwe Onda tokola Onda hanga ondjila yoku li kanyuna eifano olo. Okwali ha ndi i kouninginino ndika longe moinamwenyo. Kaume, Kalunga kwinya omunene ashike ngaashi eli monhele keshe. Monamo sha meshiivo lange. Ngee Te kwifana, Mu nyamukula.

Ongula imwe ya Sepeteba modula yo1927, Onda lombwela meme kutya Ame okwali handi i molweeendo loku kaonga onanda ko Tunnel Mill, osho shili lwopeemaila omulongananhee okudja mo Jeffersonville omo kwali hatudi pefimbo opo. Ondali nale ndalongekida olweendo loko Arizona nookaume vamwe. Eshi meme akauda kwaame natango, Kandali ko Tunnel Mill ndele mo Phoenix, Arizona, handi fadukapo puKalunga kOhole. Onghalo yomoinamwenyo okwali iwa neenghono pokafimbo, ndele diva oya kulupa, ngaashi omalihafifo makwao aeshe omounyuni. Ndele nandipopye apa, Kalunga Natumbalekwe, kutya eshiivo na Jesus ohalikulu linyenye nolinyenye efimbo keshe noiha li shuna pedu. Jesus oha yandje ombili yashili nohapupaleke alushe.

Efimbo lihapu Ame ondauda omhepo taipepe taipiti momiti dile. Okwali hashimonika shafa ngeno Ndiudite ewi Laye tali ufana kokule moixwa, taliti, “Adam, ouli peni?” Eenyofi otadi monika dili popepi oto dulu oku di kufapo neenyala doye. Kalunga tamonika eli popepi.

Oshiima shimwe tashimonika shityasha neenghono kwaame natango kombinga yoshilongo osho eepate mombuwa. Ngeenge ngo owa dimo mondjila, oho kana noupu. Hano omafimbo mahapu ovatalelipa ohava mono ounghala vashona vomombuwa ndele tavadimo mondjila yakula veke di toolepo. Ohava ngongowala mombuwa ndele tava kana nomafimbo amwe tavafi kenota. Sho osho shili mondjila youKriste – Kalunga okuna ondjila yakula. Ote i popi mu Jesaja, ekapiteli

eti35. Ohayi ifanwa “Ondjila yakula yOuyapuki.” Omafimbo mahapu omalihafifo mashona omounyuni ohaeku shiliko kondjila yakula. Ndele tokanifa owino woye na Kalunga. Mombuwa ngeenge wakana, omo omafimbo amwe hamu holoka mwafa muna omeva. Kovanhava ava tavafi kenota, oinima ei haimonika yafa omeva otainingi omulonga ile etale. Omafimbo mahapu ovanhu ohave a taataya ndele tava wile muo ohanga ashike kutya vo otave likosho mehekedu lipyu. Efimbolimwe Ndeveli oheku ulikile osho tati efimbo liwa. Osho oshinima ashike tashimonika shafa omeva, oshinima osho shihefi shoshili. Ngeenge owa pwilikine otoke li hanga ashike toongele omaluhodi momutwe woye. Ino mupupa, omuleshi omuholike. Itavela Jesus ou tayandje omeva omwenyo kwaavo vafya ondjala nenota.

Efiku limwe Onda mona ombapila yadja keumbo tai lombwelenge kutya umwe wo mu vamwameme okwali taehama neenghono.

Okwali o Edward, oo ashikula nge. Inandi dilaadila lela ndiitulamo, hano Onda itavela ota kala nawa. Ndele onguloshi imwe konima yomafiku mashona Onda li handidi koshilando eshi Nda pitila moshaala yiikulya monhele yoinamwenyo onda mona ombapila ili poshitaafula. Onde i kufapo. Oya lescha, “Bill, ila koulifilo wo koumbuwanhu. Shafimana neenghono.” Konima eshi Nda lescha etumwalaka Ame na kaume kange otwa enda twayuka koulifilo. Omunhu wotete Nda shakeneka omunambelewa omukulupe wo Lone Star oo halongele monhele yoinamwenyo. Edina laye okwali Durfy, ndele okwali hatu mwiifana “Pop.” Okwali ena oshipala shanyika oluhodi eshi ati, “Billie mumati, Ondina onghundana yoye yii.” Pefimbo opo folomana okweyapo teende. Ova lombwela nge kutya ondelekelama opo ashike yafiki taipopi efyo la mumwameme.

Kaume omuholike, oule wefimbo Itandi linyenge. Olo kwali efyo lotete meumbo letu. Ndele onda hala kutya oshinima

shotete nda dilaadila osho ngeenge ye okwali ngoo elilongekidila okufya. Eshi Nda tanauka ndele haitale okupitila momwiidi muhapu washunga, omahodi taatondoka pedu lomalupanda ange. Nghee Ame ndadimbuluka nghee twa kondja pamwe eshi twali oumatyona nonghee shakala shetu djuupalela.

Otwa ya kofikola noudjuu opo tulye shawana. Ominwe odali da pitamo meenghaku detu fye okwali tuna okudjala eekoota dakulupa daxwekelwa mofingo shaashi kakwali tunamo eehema. Nghee Ame haidimbuluka natango efiku limwe Meme okwali enamo oupungu vakangwa mokavela kashona vomusha wetu. Inatu lya nounona vakwao. Ita tu dulu oikulya ngaashi ei vena. Okwali alushe hatwii konima yomulondo ndele hatu li. Ohandi dimbulukwa kutya efiku eli kwali tuna oupungu vakangwa okwali eudifo nawa loshili. Hano opo ndilikwashilipaleke kutya Onda monamo oshitopolwa shange Ame onda ya pondje manga omusha inaufika, onda kufamo eke liwa liyadi manga mumwameme ina mona oshitopolwa shaye.

Ndele ondili ofika penya haitale ketango momwiidi wakukuta Ondadilaadila oinima aishe oyo nondakumwa ngeenge Kalunga okwemu twala ngoo konhele ili xwepo. Ndele natango Kalunga okwa ifanange, ndele ngaashi shito Onda kendabala okushilikanyuna.

Ondeli longekidila okuuya keumbo kefudiko. Eshi Rev. McKinny wOngeleka yo Port Fulton, omulumenhu ou eli ashike onga tate kwaame, a udifa epako laye okwa tumbula tati “Ota peya pena umwe apa oo ehespii Kalunga, ngeenge osho, muitelela paife.”

Oh nghee Ame nda damakatela oshipundi shange, Kalunga okwali talongo natango. Omuleshi omuholike, ngeenge ta ifana, mu nyamukula.

Itandi shi dimbwaa nande nghee Tate na Meme ovakulupe ovakwanaluhepo va kwena konima yepako. Okwali ndahala

okushuna kOuninginino ndele meme okwa indilange neenghono ndikalepo opo Ame xuuninwa ndadimina okukalapo ngeenge Ohandi kongo oilonga. Onda mona oilonga diva nOfeema yOmakwafelo Opashiwana ya Indiana, omo Ame ndakutwa paife.

Lwo peedula mbali dapitapo manga handi tutsu eemeta mofitola yometa pOilonga yOxasa mo New Albany Onda dulika eenghono koxasa ndee tai monifa Nge oixuna oule wiivike. Onda ya koondokotola aveshe Ndali ndishi. Itandi mono eveluko. Onda ehama koululu wo medimo, oo waetifwa koxasa. Osha enda nokuya komesho efimbo keshe.

Onda twalwa komukonaakoni mo Louisville, Ky. Lwaxuuninwa ova popya kutya oshali endjadja ndele tavati kutya Ondina okuya metando. Itandi shi itavele, shaashi kombinga yange Ina ndi kala nale nouyehame. Oondokotola ovati itava dulu okulongelangesha vali fiyo Ohandi tandwa. Xuuninwa onda itavela opo li ningwe ndele onda pula opo va longife omuti wokufifa pokanhele kamwe opo Ndi dule okutala etando.

Oh, Onda halele omunhu umwe oo eshii Kalunga afikame pwaame. Ondali nda itavela momailikano ndele itandi ilikana. Hano Omuudifi adja kongeleka yo Tete yo Baptist okwa ya naame konduda yokutanda.

Eshi va kufange koshitaafula va tulenge kombete yange Onde liuda handipu eenghono nokupwa eenghono efimbo keshe. Omutima wange owali tau denge noudjuu. Onda uda Efyo pwaame. Omufudo wange owali tauxupipala efimbo alishe. Ondali ndishishi Onda hanga exuulilo londjila yange. Oh kaume teeleta fiyo tohangeko lumwe ndele toka dilaadila ihapu wei ninga. Ondali ndishishii Inandi nwa nale omakaya, oikolwifa ile ndina omukalo inau yela ndele Ondi shishiilile ka Ndali ndiilongekida okushakeneka Kalunga kange.

Kaume kange, ngeenge ove oshilyo ashike shongeleka sha talala oto ka shiiva ngeenge wa hange exulilo kutya ove ino

lilongekida. Hano ngeenge osho ashike ushii osho kombinga ya Kalunga kange, Ohandi ku pula apa paife opo uye pedu keengolo doye ndele to pula Jesus ekupe eeshiivo olo lOkudalulwa, ngaashi olo A lombwela Nikodemus kombinga yalo mu Johaness, ekapiteli eti3, ndele oh nghee ehafo leengedjo talika kwena—Tumbaleka Edina Laye.

Omwa tameka oku laula monduda yoshipangelo ngaashi toti oshali momufitu wakula. Ohandi udu omhepo taipepe okupitila momafo, sho otashimonika onga ondjila yakula yaya moixwa. Ove otapeya wauda omufudo womepo taipepe omafo, taiya tayeenghene nokweenghena pwoove.

Onda dilaadila, “Heeno, eli efyo tali ilenjepo.” Oh! omwenyo wange okwali una ku shakeneka Kalunga, Onda kendabala okuilikana ndele itandi dulu.

Popepi omhepo oye uya, mokule no mokule. Omafo okwelinyenga ndele lumwe ashike poshikando Ame okwali ndaya.

Okwali tashimonika ngeno kutya Ondali ndaaluka natango okamatyona keemhadi kombada, ndafikama mondjila koshi yomuti umwe auke. Onda uda ewi linya limwe la tile, “Ino nwa oikolwifa ile omakaya.” Ndele nomafaa Nda uda okwali amwe aeke oo apepele momuti winya efiku linya.

Ndele efimbo eli ewi ola ti, “Onde ku ifana ndele ove ito i.” Ole ifola oshikando oshi3.

Ndele Ame ondati, “Omwene, ngeenge oove ngaho, efenge ndi shuneko natango kedu ndele Ohandi ka udifa Evangelioye okudja keexulo deumbo nomeekoona domapandaanda. Ohandi ke shi lombwela keshe umwe!”

Eshi emoniko eli la pitapo, Onda mona kutya Ame inandi tyapo nande xwepo. Omutandi wange omo ali natango metungo. Okwe uya ndele ta tale kwaame ndele okwali akumwa. Okwa tala afa ngeno kwali adilaadila kutya Ame ohandi kala ndafya, ndele tati, “Ame nghishi omulumenhu

omwii-kongeleka, oshilonga shange oshakula, ndele Ondi shishii Kalunga okwa talelapo okamati aka.” Omolwashike atila ngaho, Nghishishii. Kapena ou apyopya sha kombinga yasho. Ngeno Okwali nda Shiiva eshi Ndishi paife, Ngeno onda nuka ko kombete oko handi ingida Edina Laye nali tumbalekwe.

Konima yomafiku mashona Onda pitikwa ndi shune keumbo ndele natango Ondali haivele nonda fininikwa ndidjale omakende ange okomesho molwoupyakadi womomesho. Omutwe wange owakekama ngeenge Ame nda tale sha oule wefimbo.

Onda tameka okukonga nokumona Kalunga. Onda enda okudja kongeleka nokongeleka haikendabala onhele opo pali eifano loalutali yoshikulu-shonale. Oshitopolwa shi udifa nai Ame itandi mono sha. Ondati kutya ngeno Ame ondali ngoo Omukriste, Ohandi kala shili umwe. Omuudifi ou audange eshi nda popya ngaho okwati, “Paife Billy mumati, otoi mo mOifanakalo.” Ondati kutya ngeenge ngoo Onda kalele ndina eitavelo Onda halele okuluuda ngeenge leuyile ngaashi ashike ovalongwa vaninga.

Oh tumbaleka edina Laye. Onda mona eitavelo konima ndele Ame natango ondi li kwete, nokekwafelo laye Ohandi kala nalo alushe.

Oufiku umwe Onda fila Kalunga ondjala neshiivo lashili kutya Onda ya pondje konduda yakulupa yokutuvikila konima yeumbo ndele haikendabala okwiilikana. Kakwali ndishi okwiilikana pefimbo opo hano Onda tameka ashike okupopya na Ye ngaashi Handi popi nakeshe umwe. Lumwe ashike poshikando moo omweuya ouyelele monduda ndele taufoloma omushiyakano ndele ewi ladja momushiyakano olapopya naame melaka olo Ame itandi udko. Opo nhee woo owaya. Okwali nda kanghwa. Eshi Nda alukila kwaame mwene, natango onda ilikana, “Omwene ngeenge oove ngaho, kwafenge ila ndele topopi naame natango.” Onda kala handi lesha Ombibeli yange

nghee ndakala meumbo okudja koshipangelo na Onda lesha mu Johaness 4, “Ovaholike inamu itavela eemhepo keshe, ndele dikonaakoneni ngeenge do oda Kalunga.”

Okwali ndishishii kutya omhepo oya holokela nge, ndele eshi Nda ilikana oya holoka natango. Ndele kwaame okwali tashimonika shafa kutya opali pena eeponda eyovi da tumbwa momwenyo wange. Onda nhuka pombada ndele haitondokele keumbo ndele okwali tashimonika shafa ngeno hai tondoka momhepo.

Meme okwa pula, “Bill, oshike shaningwa po kwoove?” Onda nyamukula, “Ame nghishishii ndele oshili Ondi udite nawa nondimupu.” Inandi kala vali meumbo. Ohandi dimo ndele handi tondoka.

Okwali nee ndishishii kutya ngeenge Kalunga okwa hala nge duudife ota velulange, hano Ame ondaya kongeleka oyo yaitavela mokuvayeka nomaadi nokwali Nda velulwa poshikando. Onda mona nee kutya ovahongwa ovali venasha osho vahapu vomovaudifi ve heshina nena. Ovahongwa ova shashelwe nOmhepo Iyapuki notava dulu okuvelula ovanaudu noku ninga oikumwifalonga yeenghono mEdina Laye. Hano Onda tameka okulikanena eshasho lOmhepo Iyapuki ndele handi li mono.

Efiku limwe konima yeemwedi hamano lwaapo, Kalunga okwa pange ehalo lomutima wange. Okwa popya naame mouyelele wakula ta lombwelenge ndiyen dike udiye nondika ilikanene ovanaudu na Oye ote va velula shihenasha kutya omukifi washike uvakwete. Onda tameka okuudifa nokulonga osho Ye alombwelange ndishininge. Oh kaume, Ame itandi dulu okutameka kukulombwela ashishe osho shaningwapo: Omesho ali mapofi okwapatuluka. Oilema oya enda, eekaangela oda velulwa nomaludi aeshe oikumwifalonga okwa ningwa.

Efiku limwe pedu lEpandaanda loSpring, Jeffersonville, Indiana, konima yeudifoalulo loivike ivali, Ame okwali handi shashe ovanhu 130. Okwali efiku la Aguste lapupyala nokwali

pena ovanhu veli lwopomayovi atatu. Ondali ndili pokushasha omunhu omuti 17 eshi lwomeendelelo Ndauda emwen olo, lewi lishona natango ndele ola ti, "Tala pombada." Evalelwa okwali lafa oshivela shitwima mefiku olo lapupyala la Aguste. Kakwali twamona nande odula yasha oule woivike ili lwopu itatu. Onda uda ewi natango, ndele natango vali oshikando oshititatu ola ti, "Tala pombada."

Onda tala pombada ndele koo okwadja kevaledwa onyofi yakula taivema oyo Ame ndamona oikando ihapu nale ndele ina Ndi i mu lombwela kombinga yayo. Oikando ihapu Onda lombwela ovanhu nghee haiholoka ndele ohavayolo ashike nde tavati, "Bill, ove oto faneke ashike ngaho. Ile pamwe ove okwali totu ondjodi." Ndele Kalunga natumbalekwe, efimbo eli Ye okwe luulika tamonika Yeemwene kwaaveshe, shaashi oshe uya sheenghen kwaame Itandi popi nokuli. Konima yeesekonde dishona dapitapo, Onda kuwa novanhu vahapu ova tala pombada ndele ovamona onyofi ili ashike pombada yange. Vamwe ova ngabukile manga vamwe vaingida navakwao ova fadukapo. Opo nhee onyofi oyashuna mombada, ndele opo yadja okwali ifike lwopeemadi omulongo nanhano dashikweya, nonhele ei oyakala tai tanauka ile ngaashi toti omakufikufi ali taatanauka. Opali pa folomwa ponhele opo oshilemo shishona shitoka, nonyofi oya tambulwako pombada moshilemo eshi shishona.

Omuholike omuleshi, ngeno okwali ashike Ndina mo onhele mokambo omu oku ku lombwela oinima ihapu oyo yaningwa, oyo nghee etwali letu latungwa, naihapu yomomaudioalulomwenyo oo twali tuna. Ovanhu ovadja kokule nopopepi opo va velulwe. Ndele Ame ohandi ka ninga okambo aka kashona kawana opo ka landifwe kombilixa ko kafike kwaaveshe. Oinima ei oyo ku kushiivifila kutya Jesus Kristus natango okuli umwe ngaashi ali onghela no-nena nosho takala fiyoalushe, no kutya ouna oku mwiitavela ndele toxupifwa. Ngeenge oto dulu, keshe pefimbo omaudioalulomwenyo etu okuli popepi naave, kwafenge uholoke kuo.

# OMAHEPAULULO

Paife momapandja taashikula oto hange omahepaululo o Paumwene a vashona ovo va velulwa mu imwe yomoyoongi yetu.

---

Ondali moshipangelo mo New Albany, Ind. eshi Ame ndauda Bro. Branham. Ondali nda pumwa kohauto. Pakutala eemati dange adishe okwali dateka. Ombuda yange okwali ya kokoluvya. Ondali onghalo iheetifa eenghono, mekwafo lopauhaku.

Bro. Branham okwa ilikanenange, ndele pefimbo opo eemati dange odaya peenhele dado, noshoyo ombuda yange. Ndokotola ite shi udko. Onda fikama po, hai tulamo oikutu yange, ondaya keumbo, no ndaya koilonga.

Tumbaleka Kalunga molwEenghono Daye dEvelulo.

William H. Merrill, 1034 Clark St., New Albany, Ind.

---

Onda kala oshilema eedula dihapu. Ondakala nokwiidilika pombete efimbolimwe. Omaulu ange nomaoxo okwali ashilwa hano Itaidulu kweenda. Ndokotola okwati Itandi ende vali. Ondauda Bro. Branham nonghee Kalunga kwali tanyamukula omalikano aye. Hano Ame ondemwiifana. Ye nomumati umwe womunyasha wedina, DeArk, oveya ndele tava ilikanenenge. Meendelelo omaulu ange okwa velulwa. Ohandi dulu okweenda. Ohandi ende natango. Oshali eedula 4 dakapita okudja eshi shaningwa.

Ohandi tumbaleke Kalunga molwa Eenghono daye Dikumwifa.

Mrs. Mary Der Ohanion, 2223 E. Oak St., New Albany, Ind.

---

Kwaau tai dulu Okuwapalela,

Ame ondali ndalema oule wefimbo. Omaulu ange okwali ateka no kakwali vali Handi dulu okweenda. Shiikolelela komushangwa wa Ndokotola. Omumwange mati okwa undulilange koshoongi sha Bro. Bill' mokatemba kange. Oufiku oo Ame ondamona omulumenhu taende oo ina enda meedula 18. Ame onda mona natango omulumenhu ta twikuluka ndele ta ende mongeleta pehena ekwafelo lasha. Okwali atwika eedula 40 na vakwao vahapu, oingudu nomaukwatyaa aeshe omikifi okwavelulwa oufiku oo. Hano eshi efimbo lange lokwiilikanenwa leyako, ondali ndina eitavelo okwiitavela mu Jesus, kutya oye tuu ou onghela, ne-na, no fiyoalushe. Bro. Bill okwa ilikanena nge, a kwatange meke ndele tati, "Medina la Jesus – enda."

Onda uda eenghono da Kalunga deuya mwaame. Omaulu ange oo anukamo ayukilila komesho yange okwaya pofulula ndele Ame onda tameka okweenda, nohanditumbaleke Kalunga, Onda fiyapo okatemba kange ka kulu ndele handi endeko ouboloka vonumba okuya keumbo.

Mrs. T. Hargrove, 149 Spring St., Jeffersonville, Indiana

---

Ame okwali ndelikondwa ndifye nokaangela eedula mbali daya. Onda shiiva Bro. Bill oule weedula. Ndemushiiva ongo munhu omuyuuki nondakala moyoongi yaye ihapu. Kalunga temuyambeke ye talongo oikumwifalonga ihapu, hapu tapitile myue. Onde mwiifana ailikanene nge. Okangela yange oyakanapo.

Ame ondahafa natango, haitumbaleke nohaipandula Kalunga.

Mrs. L. Stinner, Missouri Ave., Jeffersonville, Indiana

---

Okwali ndii kondwa kundokotola weumbo letu, eevili ashike dishona dokukala nomwenyo. Okwali handeehama okangela eedula dili lwopu 3.

Omulumenhu wedina Wiseheart okwa lombwela nge kombinga ya Bro. Bill. Ovashinga eemaila 35 okupitila mosinou no momaisa ve uye kwaame. Pefimbo eli vafika kwinya, omwaalu wookaume kange noovamwameme owali waongala pamwe vamonenge oshikando shaxuuninwa. Ovamwange kadona ova landa eenguwo dange domombila omo veli pakele lenge. Ame okwali hanga inandi pashuka nawa eshi Bro. Bill afika po. Okwa pula ovahaitaveli aveshe vaye pondje yonduda. Ndele ye okwatwa eengolo ndele ta ilikanenenge. Onda uda eenghono da Kalunga mwaame eshi a teneka eke laye kulange, ndele poshikando Onda uda okangela yange yaya.

Onda yambuka keemhadi dange haitumbaleke Kalunga molweenghono daye. Osho okwali okonima yeedula dili 4 dakapita ndele Ame inandi kala vali nokaangela okudjaapo.

Tumbaleka Kalunga molwa Ouwa Waye.

Mrs. Sarah Hoyse, Middletown, Ind.

---

Ame okwali nda lemana okudja pedalo. Itandi dulu okweenda ile ndilongife eenyala dange nomaoko ange. Onda uda apa Bro. Bill ali tanigi oshoongalele shikumwifa shevelulo. Onda ongala nondamona oinima ikumwifa ihapu yaningwa meitavelo medina la Jesus neteneko lomake.

Bro. Bill okwa ilikanenange, ndele ta tale kwaame ayukilila ndele tati, "Medina La Jesus, enda." Onda uda eenghono da Kalunga ta duuya kolutu lange. Ondeli ufa kelombwelo, ndele oshikando shotete monghalamwenyo Onda tameka okweenda. Okwali ndina eedula 35.

Kalunga momafiku aa axuunina otalongo oikumwifa.

Tumbaleka edina Laye fiyoalushe.

---

Okakadona ketu kashona, Betty, okwali taka ehama eemweedi nhatu. Fye okwali tuna eendokotola mbali dadidilikwa doshilando, ndele otashimonika, itadi mono osheetifo. Fye natango okwali tuna ovaudifi vawa velikalekelwa voshilando noshilongo shopomudingonoko voku mu ilikanena. Okwa enda nokuninga mwii. Opo otwa tuma ko Jeffersonville, Ind., opo omulumenhu wedina Rev. Wm. Branham, oo ena omaano okuvelula pauKalunga. Bro. Bill, ngaashi ha ufanwa, okweya kushe poshikando. Komina yeevili dokwiilikana, okweya mo ndele tetulombwele kutya Omwene okwe mu ulikila emoniko mwaasho tuna okuningila Betty ketu. Oka ningapo ashike oshipa nomakipa no taka kekama efimbokeshe kafa ngeno kena oshikanyatela. Bro. Bill okwetu pula ngeenge ohatwiitavete Kalunga ndele hatwii ufa kwaashi Ati otanangi. Konima eshi ailikana ndele temuifanene kuye medina laJesus, okakadona ketu okwali kavelulwa meendelelo. Osho okwali lwopeemwedi 10 dakapita. Betty ketu paife okeli moukolele welixwapo nokwaondoka ngaashi tadulu kukala. Ohandi kala ndahafa okunyolela ku kesheumwe mepulo levelulo laye, ile keshe omavelulo oo aningwapo pefimbo lomaalulomwenyo oo Bro. Branham a ningila omu mo St. Louis mo 1945.

Evelulo olo laningwapo mOmaudifoalulomwenyo mo St. Louis otali hangwa membo loshipalanyolo “Emoniko lokEulu,” ku Bro. Branham. Likwashilipalekela oku li lescha.

Rev. Robert Daugherty, 2009 Gano Ave. St. Louis, Mo.

---

#### KWAAU TAI DULU OKUWAPALELA:

Onda kala mombete ongali eedula 8 neemwedi 9 no T.B. neendokotola ode li kondange. Onoudjuu ndi vixe eeponda 50 na okwali tashimonika kutya omukumo aushe owaya. Ndele ko Jeffersonville, Ind., lwopeemaila 35 okudja meumbo letu,

okwadja Rev. Wm. Branham, memoniko olo amona lokadjona taka kwaitwa moixwa nokwali taka kwena "Milltown" (Omo omomu Ame handidi.) Bro. Branham ina endako nale ile ashiva nande oumwe waaku. Mokuyamo, okwateneka omake kwaame ndele ta ilikana, taifanene kwaame edina lomuholike wetu Omwene Jesus. Oshinima shonumba otashimonika shafa tashikwatange ndele poshikando Ame ondapendukapo ndele haipandula Kalunga molweenghono Daye dokuvelula. Ame ondaya pondje-yomivel oshikando shange shotete meedula 8, ndele onda shashelwa momulonga, medina la Jesus Kristus. Ame paife ohandi shiki okaxumba pongeleka yo Baptist apa. Oshihapu tashi endele pamwe nevelulo eli lakula. Kandina mo omito memono omu okushinyola ashishe. Ohandi nyola ndahafa ndele handi lombwele mouyadi ku keshe umwe elitulamo mevelulo lange.

Georgia Carter, Milltown, Indiana.

---

#### KWAAU TAI DULU OKUWAPALELA:

Ondali nda tandwa nokwali ndina Efolomo lokaangela okudja petando. Ondaninga ashishe osho Ame ndishi okuninga ndialukile moukolele wange, ndele ondadopa. Omukulukadi wange naye okwali taehama ndele otwa uda Rev. Branham nonghee Kalunga kwali talongo okupitila muye mokuvelula ovanaaudu. Otwaya keumbo laye omutenya wOshoondaxa shimwe lwokonima yeemwedi hamano dakapita, ndele eshi twafika otwa hangako vakwetu nelalakano limwe, novavelulwa. Ndele otwa popya na Bro. Branham hatu mu pula ngeenge openasha hatudulu okushiningilwa. Otwemu lombwela fye otwali ovaKatoolika ndele okwetu lombwela kutya evelulo lopauKalunga okwali tali hange kwaaveshe ovo tava itavele. Okwa ifana elitulemo letu kokaadona oka Katoolika oko katambula emoneko lako okudja eshi apula Kalunga eka kwafele, ndele paife otaka lesha nawa ominyolwa.

Okwali ka twika kutya okwali ka twalwako keumbo laye. Ndele Ame nomukulukadi wange otwa ilikanenwa ndele atushe otwa velulwa. Okangela yange oyakanapo! Fye paife otwahafa notwa ndjanga nongula keshe Ohandi penduka kudja mombete ndele handi ilikanene Bro. Branham noilonga yaye ya Kalunga eevili 3. Ondina ongeshefa yomalusheno omu moshilando ndele ongula yOshoondaxa keshe ohatwii kemisha longula ndele nhee hatweendelele hatutauluka onhopa twayuka kEtwali la Branham. Natango ohatu holoka komambo okonguloshi nokomailikano okonguloshi mEtitatu. Otuna efimbo likumwifa notashimonika shafa tuli mounyuni upe. Ohandi nyamukula nehafo ombapila keshe kouyelele mevelulo lange.

Louis H. Head, 417 Garnet Court, Louisville, Ky.

---

Onda hala oku wedapo emono lange lefimano la Kalunga shinasha nevelulo lo pauKalunga. Lwopeedula nhatu lwaapo Ondali handi hepekwa koudu woshipa, oo wakala nokutandavela nokukula nai neenghono, fiyo kombada yeenyala dange nokombada yeemhadi dange kwaninga ekoko likukutu. Okwali da dinda nai notadilulumma neenghono. Mu Apilili wo11, 1945, Bro. Branham okwa vayekange ndele tateneke omake kwaame meilikano, ndele ponhele yokukala xwepo, Onda twikila nokunaipala, ndele eshi Nda kala nokulongifa omaadi oshipa keenyala dange nokeemhadi, Onda dilaadila osho shuude osho shali etomhelo Ame inandi velulwa. Hano Onda tokola oku xulifapo elongifo lomiti adishe ndele handifiile oupyakadi wange mouyadi kOmwene. Mo 10 a Juni, Bro. Branham na Bro. Seward ova ilikanenange natango ndele Omwene okwa velula nge, Tumbaleka edina Laye liyapuki! Lumwe aluke manga Bro. Branham kwali ina vayekange molwounghundi weemadi. Eemhadi dange odalulumma opo hano daetifa ouyehame wakula ndi hadule kweenda. Ndele

okudja eshi Ame kwali nda vaekwa, eemhadi dange odaninga eenghono, ndele nhena Ohandi dulu okweenda oshinano shile nokauyehame ashike kashona shidulife okanano ashike kashona manga inandi vayekwa. Na Ondahala okuwedapo kutya eshi hasho nande oshikando shange shotete Neveluko pauKalunga. Eedula Omilongombali-naimwe dakapita, Onda ile kosoongalele tashiwilikwa ku Rev. C. H. Erickson ko Columbus, Ind. Vakwetu okwali vavelulwa koumukifi vonhumba ndele eshi nda hepekwa kounghundi mwii wonhe yeisho moule wefimbo lile nokwali taikulu meisho lange lokolulyo opo ya tuvika kombinga okumonako kwange (ngeno oya twifikange mefimbo), Ame, naame, ondapula Omwene a velulenje ndele Ye okwaninga. Ame kakwali nande vali nda piyaanekwa nande onokamukifi. Onda tambula omayambeko aa ndili omutumba moshipundi shange, shaashi lnandi pula omalikaneno a Rev. Erickson. Onda mona omavelulo nonduda nondalesha omamono a vakwetu. Konyala eedula mbali dakapita Onda pita eumbo lili popepi noProspect, Ky. Okaana kashona, takayehama okwali ka nangala poshilapi moluumbo ndele ina okwa lombwelange kutya Okwali kena eemwedi dapita punhee nokakala nokweehama onghalamwenyo aishe yako ixupi. Okali kautama neenghono noitaka dulu okulyasha ina ka kwena kouyehame. Oshoondaxa Eshi shashikulako Onda lombwela Bro. Branham kombinga yokaana. Ye novaongali ovailikanena okaana, ndele konima yoivike ishona Ame natango ondapita peumbo eli ndele haipula kombinga yokaana. Okwali takakala nawa notaka wedako hoshivixa. Onda yamo ndike ka tale, ndele okwali takali notake shityapula shili. Osha nyolwa kutya Tate wetu womeulu okwa yandja komhona Waye Jesus Kristus, eenghono adishe meulu nokombada yedu, nokwa yandja Kuye edina pombada ya keshe edina, na Petrus okwati kutya oshali omedina Laye, Okupitila meitavelo medina Laye, omo omulumenhu woshilema kwali a velulwa pOshivel shoTeembeli. Omedina olo limwe lafimana oinima ei ikumwifa ya ningwa nena. Ndele

ngeenge twavelulwa meilikano leitavelo, eshi hao omayambeko ashike hatu tambula, ndele otashi twaalele nekwashilipaleko lomatimba adimwapo. Jakob. 5:15.

Kalunga napandulwe kutya otuna mounyuni ou wapiyaanekwa, ovalumenhu ngaashi Bro. Branham, Erickson, John Sproul navakwao ovo Omhepo yapa omaano evelulo pauKalunga. Jesus Kristus oye umwe onghela, nena nofiyoalushe. Ndele Ye ota dulu ashike nokwahala okutu velula ngaashi Ye audifa Evangel iOuhamba ndele tavelula ovanhu eedula omafele omulongo nomuwoyi dapita. Onda mona Joan Gray, okaana kashona oko kwali takavele, mo 26 Aguste. Koo paife okapita okena eemwedi dapita po 27 nokeli nawa nonoukolele ngaashi tashi shiva.

Woye mu Kristus Jesus,

G.W. Jones, 705 E. Maple St., Jeffersonville, Ind.

---

Ookaume ovaholike, okuna vamwe ovo vavelulwa novahala okuyandja eshi va ningilwa ongo vamoni keenghono da Kalunga ndele katuna ashike onhele yasho paife mokambo aka kashona. Oinima ei va ningilwa oyo yahandjwa oyo ku kutwa omukumo uitavele Jesus Kristus ndele tomushiiva onga Omuxupifi nOmuvveluli woye.

Vahapu ovo hava lesha Ombibeli, otavati, "Ngeno O ndaliko ngoo momafimbo Ombibeli, ngeno Ohandii ku Jesus ndele Ota dulu okukwafela nge." Kaume, opo eli apa nhena eku kwafele, ngaashi ashike ali mefiku olo. Itavela ashike Omhepo Iyapuki, Oye ombangi wa Jesus. Kwafenge, opo ashike uli, Mu itave, ndele ove otovelulwa.

# EUDIFO

Okatopolwa ketu otaka hangika mu Jesaja, 53:5.

“Ye okwa tuwa molwomatauluko etu, anyanyaulwa molwoiningilewina yetu. Ehandukilo lombili yetu olali Puye ndele koipute yaye fye otwa velulwa.”

Paife kaume, Ombibeli otaiti, “Koipute Yaye fye otwa velulwa.” Nafye ohatu dimine fye natango otuna ediminepo lomatimba etu ketiko lohonde Yaye, noshihena naashi fye twa longa. Omolwashike? Molwaashi sho oshali metimbayambo, osho toti. Kashali oipute Yaye yEvelulo metimbayambo yo? Hano ngeenge etimbayambo levelulo ola kanifa eenghono, hano ove ouli momatimba oye; shaashi, etimbayambo lomatimba oye ola ningwa kOhonde imwe yadja momunhu umwe ponhele imwe, pefimbo limwe, mefiku limwe.

Hano oto dulu kutya yo ohailongele kumwe ile kutya kaina eshi taiti.

Ahowe, kaume, ove itavela ashike Jesus shimwe nevelulo loye ngaashi honingi molwomatimba oye, ndele etimbayambo otali longo shifike pamwe. Otali ku longele omukalo keshe, ngeenge waitavela kutya oove kwali laningilwa mefiku eli ngaashi yo kwali kuvo mefiku linya.

Ngaashi ashike ove toi wayuka komulonga u tauluke mombautu-felefuli, uwete vakweni tava tauluka, hano ove omolwashike ito shidulu? Ove iho i komuwiliki womokambautu ndele tomupula ngeenge okambautu otaka twala ile ahowe. Ove ohofutu ashike olefa yoye, toi mo ndele tokala omutumba. Osheli kolelela hano komushingi wokambautu okuku taulukifa omulonga.

Omukalo umwe paVelulo pauKalunga, uuwete vakweni tava velulwa ndele naave oto dulu okuvelulwa yoo. Inda ashike ku Jesus. Ofuto yolefa momhito omu oku itavela, nena oshiikolela ku Jesus eku mone wapitamo.

Oh, omumwamememati nomumwamemekadona, Mu itavela, ove naaveyo oto dulu okuvelulwa. Efiku 1Oikumwifalonga ina li pita kwaavo vaitavela hasho.

Oshinima shilipi honingi tete ngeenge tolongekida olweendo lokwiihafifa? Ove ohokufa embo lomusholondodo wodula lovakinhu ovakulupe ndele totale ngeenge mefiku omo embo otaliti ngeenge otaku kakala takulokwa ile otakukala kwayela. Ndele ove oto nyakukwa ngeenge otashi ti okwayela. Ndele ove ototi, “Ohatu longekida olweendo lokwiihafifa lefiku olo.” Ove oto lande omusha woye aushe wokudjapo molwaashi ashike embo lomusholondodo wodula olati “okwayela.”

Oh, mumwamememati nomumwamemekadona, oho tula eitavelo lakula lifike opo membo lomusholondodo wodula, omolwashike ito itavelele mOndjovo ya Kalunga? Dimbulukwa Kalunga alushe okwa kala na vamwe ovo vaitavela, omolwashike ito ningile umwe womuvo paife? Lesha Markus 16 ndele totale kutya elombwelo laxuuninwa lapewa ongeleka okwali okuvelula ovanaudu. Ye okwati “Ndele omadidiliko aa otaashikula ava vaitavela.”

Ngeenge ongeleka yoye otaiti kutya vo ovaitavela ndele omadidiliko itaa shikula, nena sheikolelala kOndjovo ya Kalunga vo inava itavela.

Pula omunhu umwe nena edidiliko liwa lomwiitaveli ndele vo otava ulike mo omunhu umwe eli momukalo wefikamo liwa pomaliyahifo. Umwe ou ha umbu nawa mokambale kongalo. Oh kaume kange, vamwe vomuvo kaveshi shihapu kombinga ya Kalunga vedulife omu Hotendoti eshii kombinga youfiku wo mu Engipiti, na vamwe vomuvo ovanaifikola va pushekeka nawa vadja meeseminali yoo. Ndele inopumbwa ukale omunafikola opo ushiive Kalunga. Ndele ove ouna okuninga shihapu shidulife vahapu vomuvo, ove ouna okwiitavela nongeenge oto itavele omadidiliko omu Markus 16:17-18 ota eku shikula ngaashi Jesus ati osho taaningi.

Dimbulukwa mu Markus 16 okwa tiwa udifa Evangeli ku keshe oshishitwa. Ove pamwe ototi, "Bro. Branham, Evangeli oshike, opo fye tushiive ngeenge otulina ile katulina. Olo Ondjovo?"

Paulus okwati kutya Evangeli ole uya kufye shihefi mondjovo ashike ndele kEenghono nEuliko lOmhepo Iyapuki. Ndele ove inopumbwa nee okukala una Eenghono dOmhepo Iyapuki wuulike omadidiliko a Markus 16?

Tuula pamwe naame mu Timoteus omu2, Ekapiteli eti3 ndele tomomo nghee Omhepo Iyapuki yati kutya momafiku axuuninwa ovanhu otava kala vena emoniko letilokalunga ndele nee tava shilike eenghono dalo, ndele kovanhu vatya ngaho Ombiibeli oyati ove u tanauke ko.

Kalishi edidiliko olo kutya fye otuli momafiku axuuninwa? Ovanhu otava shilike eenghono dokuvelula nokukala yo vamanguluka komatimba.

Eengeleka otadi talala okayelekifo takia i pomilongo hamano pedu la nola. Ove ito kala nefindano ndele to tulamoilonga Evelulo pauKalunga pamwe noukalata veepaati nousekeleta. Ovanhu vamwe ohava i kongeleka ongula yOshoondaxa nekaya la kula momakanya avo, tavamonika vafa onanguda yoko Texas ya tetwa eembinga. Ondjovo otaiti kufye tulikoshe sheevene ku keshe ekako. Oh mumwameme, tanaukako koinima yoye oikwaunyuni ndele tolongele Kalunga. Ndele ye tekupitikile okweenda moshitauwa shaye shambwalangadja shOuyapuki ngaashi Jesaja omu35 eshi popya.

Ngeenge omunhu umwe okwe kweetele otyeke yo \$70,000.00 ove oto tameke tonyakukwa. Ngeenge Ame onde ku pula kutya owa hafela shike, oto nyamukula kutya owali una \$70,000.00. Ngeno Ame onde shaanyene ove oto pengo otyeke. Ngeenge Ame ondati kutya okwali ashike okapambu kombapila kanyolwa muko ove otonyamukula meendelelo

kutya opuna kukala \$70,000.00 da depositwa nEpangelo la U.S. manga otyeke ina i nyolwa nokutya hano epangelo otali i yambidida.

Shiiva hano kutya Jakob 5:14 okwati kutya eilikano leitavelo otali xupifa omunaudu. Ove otapeya toti kutya osho okwali ashike ombapila yanyolwa muyo. Ndele mumwameme, Eulu alishe otali yambidida Ombiibeli.

Ngeenge tolesha Ondjovo Yaye dimbulukwa eudaneko okwoove. Nena tameka tonyakukwa nokwiitavela ndele Yee oteku velula.

Oye Kalunga umwe nena no fiyoalushe. Amen.

OVAMBO

©2011 VGR, ALL RIGHTS RESERVED

VOICE OF GOD RECORDINGS  
P.O. Box 950, Jeffersonville, Indiana 47131 U.S.A.  
[www.branham.org](http://www.branham.org)

## Oufemba didiliko

Eemhito adishe oda kalekwa. Embo eli otali dulu okunyanyangidwa koprinta meumbo molwa elongifo lopumwene ile okuyandjwa po, oshali yovene, onga oshilongifo okuandjakaneka Evaengeli laJesus Kristus. Embo eli itali dulu ku landifwa, okwiindjipalekwa mondwanga, okutulwa kowebsite, okutuvikilwa momukalo wonumba, okufatululilwa momalaka akwao, ile okulongifwa molwa eyambidido lopashimaliwa pehe na epitikilo laVoice Of God Recordings®.

Molwa ouyelele uhapu ile molwa oilongifo ikwao ili po, alikana kwatafana:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)